

古

今

譚

槩

越情部第十目錄

不畏勢

不佞神佛

計三條

不畏雷

計二條

不畏鬼怪

計六條

不近內

不戀色

不愛錢

計二條

不愛古玩

計二條

好友

不苟察

不問射牛

不攷侮慢

計九條

觀樂

贈菊

罵罵已者

不責僮婢

計三條

不責盜

計六條

不畏劫賊

不怕死

計二條

越情部

子猶曰、天下莫靈於鬼神、莫威於雷電、莫重於生死、  
莫難忍於氣、莫難捨於財、而一當權勢所在、便如鬼  
如神、如雷如電、捨財忍氣、甚者不惜捐性命以奉之  
矣、人情之蔽、無甚於此、故余以不畏勢爲首、而大第  
集爲越情第十

○不畏勢

况鍾謁一勢閹拜下、不答、斂揖起云、老。太。監。想。不。喜。拜。  
且。長。揖。

應擯守常州、偕他郡守謁御史、擯居中、獨違憲綱不跪、他日御史見之、指曰、此山字太守也。

○○不佞神佛

彭脊菴七歲、從鄉父老入佛寺、不拜、寺僧強之、不從、反叱之曰、彼佛裸跣不衣冠、我何拜爲。

周文襄公在吳中、好倘佯梵刹、見佛卽拜、士夫笑之、文襄曰、論年齒亦長我二三千歲、豈不直得一拜、子猶曰、一是達者之言、一是長者之言。

紹興王元章、國初名士、所居與一神廟切近、囊下缺薪、

則斫神像費之、一鄰家事神惟謹、遇元章毀像、輒刻木補之、如是者三四、然元章家人歲無恙、而鄰之妻孥時病、一日召巫降神、詰神云、彼屢毀神、神不責、吾輒爲新之、神反不我祐、何也、巫者作怒曰、汝不置像、像何從而費、自是其人不復補像、而廟遂廢

李夢陽督學江右、渡江、有司請祀水神、公怒、命從者縛神投諸江、曰、以水神投水、得其所哉、得其所哉

○不畏雷

夏侯玄倚柱讀書、時暴雷霹靂破所倚柱、衣服俱焦、玄

神色不異讀書如故

世說謝安亦然

小人全要畏雷不畏者其心放君子要不畏雷不畏者其神全元四明陳子桎作通鑑續編書宋太祖廢周主爲鄭王雷忽震其几陳厲聲曰老天便打折陳桎之髻亦不換矣做事須有此等骨力

齊神武道逢雷雨前有浮圖一所使薛孤延視之未至三十步震燒浮圖薛大聲喝殺繞浮圖走火遂滅及還鬚髮皆焦

○不畏鬼怪

積中散常於夜中燈火下彈琴，有一人入室，初來時面甚小，斯須轉大，遂長丈餘，顏色慘黑，單衣草帶，積熟視良久，乃吹火滅，曰：「取與。」應聲爭光。

阮德如嘗於厠見鬼，長丈餘，色黑而服大，著卑單衣，平上幘，去之咫尺，侃徐視，笑語之曰：「人言鬼可怖，果然。」鬼慚而退。

唐魏元忠未達時，家貧，獨有一婢，厨中方爨，出汲水還，乃見老獺爲其看火，婢驚白之。元忠徐曰：「獺，慰我無人力，爲我執爨甚善。」又嘗呼蒼頭未應，狗代呼之，又曰：「此。」



孝順狗也。乃能代我勞。又獨坐。有羣鼠拱手立其前。又曰。鼠饑。就我求食。乃令食之。夜中。鴝鵒鳴其屋端。家人將彈之。又止之曰。鴝鵒晝不見物。故夜飛。此天地所育。不可使南走越。北走胡。將何所之。其後遂絕無怪。

安定郡王趙德麟。建炎初。自京師挈家東下。抵泗州北城。於驛即憩宿。薄晚。呼索熱水。卽有妾應聲捧杯以進。而用紫蓋頭覆首。趙曰。汝輩旣在室中。何必如是。自爲揭之。乃枯骨耳。趙略無怖容。連批其頰曰。我家豈無人給使。要汝怪鬼何用。叱使去。

吳邑荻扁王君鐸嘗臥齋中夜將半有鬼嘯於前其聲  
類鳴鐸聞之無所懼但云汝叫自叫吾不管汝但勿近  
吾牀聒吾耳也鬼乃作鵝聲鐸笑曰此聲亦不雅鬼終  
不去復作天鼓翼之聲庶幾其一懼鐸曰吾且熟睡不  
聽汝矣鬼必欲動之遂落其牀帷覆鐸身鐸曰吾適寒  
覆之甚宜鬼無如之何遂寂然矣

嘉靖中錫人王富張祥俱有膽素不畏鬼夏日同飲溪  
上日且晡未醉王曰隔溪叢塚中昨送一新死人吾能  
乘流而過出其屍於棺外張曰吾能黑夜出之王曰果

爾輸汝臘醲一瓮。俄而日沒。張子方欲入水。而王亟歸。家取酒。張遂過溪。迂迴而上。見棺已離蓋。方疑之。忽棺中出兩手。抱張頸。張懼。私祝曰。汝少出。俟我賭勝。明日當奠而埋汝。言畢。抱益急。張大叫。聲漸微。溪傍人家聞聲。羣持火來照。抱張頸者。乃王也。蓋詭言取酒。從閣處先渡出屍。而伏棺中耳。因相與大笑。比過溪。月已上矣。時方大瘟。而二子竟無疾。

○不近內

北齊邢子才與婦甚疎。未嘗內宿。嘗盡入內閣。爲犬所

吠。因撫掌大笑。

世俗沈耳於閨者最多。故寧取子才。

○不戀色

王處仲嘗荒恣於色。體爲之敝。左右諫之。曰。吾乃不覺耳。如此甚易。乃開後閣。悉驅諸婢妾出任其所。之鐵石心腸。英雄手段。

○不愛錢

嘉興許應遠爲東平守。甚有循政。而爲同事所中。得論調去。吏民哭泣不絕。許君晚至逆旅。謂其僕曰。爲吏無

所有只落得百姓幾點眼淚耳。僕歎曰：阿爺囊中不着一錢，好將眼淚包去作人事送親友，許爲一拊掌。若囊中大錠黃白，亦未必肯送親友。

董三泉公由蜀西充令，陞蓬州守，宦十數年，許僅一青布袍、一革靴。赴任時，諸子請曰：平生志節，兒輩能諒。第大人年高，蜀中多美材，可爲百歲後計也。公曰：唯。旣致政，諸子迎之，間請於公曰：往者所言美材，頗擇得否？公曰：聞之人言，杉不如栢也。子曰：今所具者栢耶？公莞爾曰：吾茲載有栢子在，種之可爾。

○○不愛古玩

有一朝士家藏古鑑、自言能照二百里、將以獻呂文穆公。公曰：「我面不及鑑子大，安用照二百里之鑑乎？」不用。孫之翰人與一硯，直三十千，云：「此石呵之則水流。」翰曰：「一呵得一擔水，只直三文錢，何須此重價？」

語似俗而實達，推廣此意，則一飽之需，何必八珍九鼎、七尺之軀，安用千門萬戶？

○好友

何喬新守溫，夜乘小艇訪虞徵君原璩，坐久索飲，村居

無所覓、公歎雖醢醢亦可、乃出新醢一餅共酌、劇談竟夕而別、時稱何真醢交。

醢交勝於酒友。然交到好處亦不得不醢。

○不肯察

王文正公旦性量寬厚、不屑細物、有控馬卒歲滿辭、公問汝控馬幾時、曰五年矣、公怪曰、吾不省有汝、既去復呼回曰、汝乃某人乎、曰然、於是厚贈之、蓋平日控馬公但見其背、不見其面故、因去見其背、方省也。

○不問射牛

奇章公牛弘有弟弼、好酒而酗。嘗醉射殺弘駕車牛。弘還宅，妻迎謂曰：「叔射殺牛，弘直答曰：『可作脯。』」

○不校侮嫚

婁相師德溫恭謹慎，與人無毫髮之隙。弟授代州刺史，戒以勿與人競。弟曰：「今後人唾吾面，亦自拭之耳。」師德曰：「此我所以憂汝也。凡人唾汝面，必怒汝故拭之，是逆其心。夫唾不久自乾，但當笑而受之。」

武元衡宴西川從事楊嗣復狂酒，逼武大觥，不飲，遂以酒沐之。武拱手不動。沐訖，徐起更衣，終不令散宴。



馮道在中書有人於市中牽一驢以片幅大署其名於面親知白之道曰天下同名姓何限○推○開○尋○得○慮是失驢訪主

富鄭公致政歸西都嘗着布直裰跨驢出郊逢水南巡檢威儀呼引甚盛前卒呼騎者下公舉鞭促驢卒聲愈厲又唱言不肯下驢請官位公舉鞭稱名曰弼卒不曉所謂白其將曰前有一人騎驢衝突請官位不得口稱弼弼巡檢悟曰乃相公下馬伏謁道左其僮贊曰水南巡檢唱喏公舉鞭去

充公陸象先爲馮翊太守參軍等多名族子弟以象先

性仁厚，於是與府寮共約戲賭。一人曰：我能旋筭於廳前，硬弩眼眶，衝楫使君唱喏而出，可乎？衆皆曰：誠如是，甘輸酒食一席。其人便爲之。象先視之，如不見。又一參軍曰：爾所爲全易，吾能於使君廳前墨塗其面，着碧衫子，作神舞一曲，慢趨而出，羣寮皆曰不可。誠敢如此，吾輩當斂俸錢五千爲所輸之費。其二參軍便爲之。象先亦如不見。皆寮所賭以爲戲笑。其第三參軍又曰：爾之所爲絕易，吾能於使君廳前作女人梳粧，學新嫁女拜舅姑四拜，則如之何？衆曰：敢爲之。吾輩願出俸錢十千。

充所輸之費。其第三參軍遂施粉黛高髻簪釵。衣女人衣。向堂四拜。象先又不以爲怪。景融大怒曰。家兄爲三輔刺史。今乃成天下笑具。象先徐語景融曰。是渠參軍兒等笑具。我豈爲笑哉。

溫公一日省墓。有父老五六輩上謁云。欲獻薄禮。乃用瓦器盛飯。瓦罐盛菜羹。公欣然享之。村老曰。某等聞端明在縣日。講書。村野不敢往聽。今幸請教。公講庶人章。村老曰。自天子章以下。有毛詩二句。此獨無。何也。公嘿然謝曰。平生未見。查明奉答。村老大笑而去。曰。今日聽

講難倒司馬端明

楊文懿公守陳、以洗馬乞假、行次一驛、其丞不知爲何官也、坐而抗禮、卒然問曰、公職洗馬、日洗幾馬、公漫應曰、勤則多洗、懶則少洗、無定數也、俄報一御史且至、丞促令讓上舍、公曰、固宜、俟其至、讓之未晚、比御史至、則公門人也、跽而起居、丞惶懼、百態乞憐、公卒不較、張莊懿公鑒、巡按東省、初到臨清、偶酒家酒標掣落其紗帽、左右失色、旦日、州守縛此人待罪、公徐曰、此是上司過往處、今後酒標須高掛、還遣出、

屠滿位冢宰、有鄉人假稱屠公子、沿途騷動、人以聞於公、意公大加譴責、公但呼而告之曰、汝爲我兒、亦不辱、但難爲若翁耳、汝有明禁、自今慎無爲此。

○觀樂 贈菊

柴載用投家樂於後園、有左右人竊於門隙觀之、柴乃召至後園、使觀其按習、曰、隙風恐傷爾胖子。

王荆石相公家居、晨起、帶氈帽行園視菊、其鄰人誤爲園丁、隔簷喚曰、王老官、汝許我菊花、今有否、旣見公面、驚而走、公喚回撫慰、取菊數本與之。

○○薦言已者

王元美鎮鄆、薦一屬吏、乃其鄉人、常言公者、或曰、自今以往、凡求薦者、皆言公矣、元美笑曰、不然、我不薦彼、彼更言我。

○○不責僮婢

唐臨性寬仁、多恕、常欲弔喪、令家僮歸取白衫、僮乃誤持餘衣、懼未敢進、臨察之、謂曰、今日氣逆、不宜哀泣、向取白衫且止、又令煮藥不精、潛覺其故、乃謂曰、今日陰晦、不宜服藥、可棄之、終不揚其過也。

陽城嘗絕糧、遣奴求米、奴以米易酒、醉臥於路、城迎之、  
奴未醒、乃負以歸、及奴覺謝罪、城曰、寒而飲、何害也、

我蘇有一鄉老訪友、以一僕駕舟、友人畱飲、僕遂沾  
醉、臥舟中、鄉老欲歸、不得已、解衣自棹、偶道上一人  
欲附舟、呼之、鄉老慍不答、其人呼不已、僕於舟中瞑  
目、大聲曰、便附一附、何妨、鄉老憤甚、鼓棹甚急、道上  
人聞之、罵曰、舟中家主已允從附、搖櫓家人反不肯、  
大罵不止而去、

房文烈遣婢易米、三日不反、既至、房曰、舉家無食、汝從、

何處來

○○不責盜

張率字士簡，吳人，嗜酒疎脫，忘懷家務，在新安，遺家僮載米三千斛還吳，耗失大半，張問其故，答曰：雀鼠耗也。張笑曰：壯哉雀鼠，不復研問。

柳公權嘗貯杯盂一筭，縑絨如故，而所貯物皆亡，奴妻言不知，公權笑曰：銀杯羽化矣，不復詰。

宋沈道虔，人有盜筍者，令人止之，曰：此筍欲成林，更有佳者相與，令人買大筍送與之。范元琰見人盜筍，苦於



過溝乃伐樹爲橋與過盜遂不爲盜

後漢戴封字平仲遇賊悉掠奪財物餘緜七匹賊不知處封追與之賊曰此賢人也悉還其器物

王子敬夜臥齋中有羣偷入室盜物都盡王徐曰青檀我家舊物可特置之

何宗道名倫江山人家貧事母孝年二十七始發憤讀書盜夜入其室竊器物何覺而不呼將取釜始言曰盜留此備吾母爨盜赧然委之而去

前二人不責內盜後五人不禁外盜竟亦何嘗誨盜

也。于肅愍公謙巡撫河南山西時，舟行遇劫，遍搜行囊，更無貴重於腰間金帶者。盜竟不忍取，又沈文卿家居，盜入其室，沈口吟一絕云：風寒月黑夜迢迢，辜負勞心此一遭。只有破書三四策，也堪將去教兒曹。盜亦舍去，孰謂盜無人心哉。

○不畏劫賊

阮簡字茂弘，爲開封令，有劫賊，吏白曰：甚急。簡方與客圍棋，長嘯，吏曰：劫急。簡曰：局上劫亦甚急。

○不怕死

宋明帝賜王景文死，景文在江州，方與客棋，看敕訖，置局下，神色怡然，爭劫竟，斂納奩畢，徐言奉敕賜死，方以敕示客，因舉觴謂客曰：「此酒不堪相歡，遂一飲而絕。」

張黃門

張融字思光

出爲封溪令，廣越嶂險，獠賊執張，將殺

食之，張神色不動，方作洛生咏。

越情部 終

供達部第十一目錄

簡文帝

張徐州

楊鐵唾

酒濯足

百輝

盜

乞

唱蓮花道情

募緣

傭

祝京兆

計二條

白羊肉羹

裴御史

漢書下酒

劉伶

二張 計二條

豪飲 計三條

酒狂

鄭鮮之

飲不擇偶 計三條

劉公榮

皇甫亮

李仲元

陶成

黃勉之

徐昌穀別墅

陶彭澤 計三條

阮籍 計三條

嵇梭

追婢

挾妓游行 計二條

揖妓

滕元發

收司成榜

僧壁畫西廂

湯義仍講學

謝尚

王子猷計二條

張季鷹

殷璩章

王敬弘

馮道

風流學士

李封公陰德

合歡杖

爭猫

佻達部

子猶曰。百國之木。不於枝葉取憐。士之所跪自喜。不  
拘小節者。其中儘有魁傑駿雄。高人才子。或潛見各  
途。能不盡見。吾亦姑取焉。以淘俗士之肺腸。集佻達  
第十一

○簡文帝

簡文爲撫軍時。床上塵不聽拂。見鼠行跡。視以爲佳。

○○張徐州

裴寬尚書罷郡西歸。汴日。晚維舟。見一人坐樹下。衣服

極敵與語大奇之曰以君才識必當富貴舉船錢帛奴婢悉以貺之客受貺不議登舟奴婢稍偃蹇輒鞭之裴公益異焉其人張徐州也

卓老曰張建封易得裴寬難逢

○楊鐵崖

姑蘇蔣氏巨家也有子甫八齡欲爲求師時楊鐵崖先生居吳淞放情山水日携賓客妓女以文酒爲樂蔣往延之楊曰能從三事則可幣不足計也一無拘日課二資行樂資三須十別墅以貯家人蔣欣然從之楊畱三



年後其子俱成名士  
奇賓奇主千古罕見

○○酒濯足

馬周初入京至灊上逆旅數公子飲酒不之顧周卽市  
斗酒濯足於旁

○○百禪

梁吉士瞻少時擲博無禪爲儕輩所侮及爲將軍得絹  
三萬匹爲百禪其外竝賜軍士

○盜

祖車騎過江時、公私儉薄、無好服玩、王庾諸公共就祖、忽見裘袍重疊、珍飾盈列、諸公怪問之、祖曰、昨夜復南塘一出、細常自使健兒行劫、在事之人亦容而不問、

細常自使健兒行劫、在  
事之人亦容而不問、

李卓吾曰、擊楫渡江、誓清中原、使石勒畏避者、此盜也、俗儒豈知、

〇乞

南唐韓熙載字叔言，肆情坦率，鼓樂百餘人，日與荒樂所得月俸，散與諸姬。熙載敝衣芒屨，作醉者持獨絃琴，俾門生舒雅執板挽之，隨房乞食，以爲笑樂。

按後主屢欲相熙載，嫌其後房妓妾，不問出入，乃左授右庶子，分司於外。熙載上表乞留，盡出羣婢，後主乃喜，以爲秘書監。既拜命，羣婢復集如初。

○唱蓮花道情

蘇郡祝允明，唐寅、張靈，皆誕節倡狂。嘗雨雪中，作乞兒鼓節，唱蓮花落，得錢沽酒。野寺中曰：此樂惜不令太白知之。又嘗披氈持藍，相與踰虎丘爲道人唱，有客吟頗澀，乃借筆疾書數韻。雲煙滿紙，翻然而逝。客縱跡之，不得，遂疑爲仙。

此真仙又何疑。

○募緣

唐子畏祝希哲兩公浪游維揚、費用之絕、戲謂鹽使者、  
課稅甚饒、乃僞作玄妙觀募緣道士、衣冠甚偉、詣臺造  
請、鹽使者怒咤之、兩公對曰、貧道非游食者流也、所與  
交、皆天下賢豪長者、卽如吾吳唐伯虎祝希哲輩、咸折  
節爲友、明公不棄、請奏薄技、惟公所命、御史齊威隨指  
牛眠石爲題、命賦之、唐先祝繼、立就一律、詞云、嵯峨怪  
石倚雲間、頭角崢嶸勢儼然、苔蘚作毛因雨長、藤蘿穿

昇任風牽長眠不食。縣邊草無力難耕。隴上田怪殺牧  
童鞭不起。笛聲斜挂夕陽煙。御史得詩笑曰。詩則佳矣。  
意欲何爲。兩公進曰。明公輕財好施。天下莫不聞。今姑  
蘇玄妙觀圯甚。倘稍俸葺之。名且不朽。御史大悅。卽檄  
下長吳二邑。資金五百爲葺觀費。兩公遂乘扁舟歸。投  
檄二邑。更修刺謁二尹。詐爲道士。關說得金如數。乃悉  
召諸妓。及所與游者。暢飲數日而盡。異日鹽使者按吳。  
詣觀瞻禮。見傾圯如故。召令責之。對曰。前唐解元祝京  
光兩公自維揚來。極道明公爲此勝舉。金已如數昇之。

久矣、鹽使者悵然、心知兩公、然惜其才、不問也

○備

唐子畏往茅山進香、道出無錫、晚泊河下、登岬閒步、見肩輿東來、女從如雲、中有丫鬟尤艷、唐跡之、知是華學士宅、因逗遛請爲備書、改名華安、復寵任、謀爲擇婦、因得此婢、名桂華、居數日、爲巫臣之逃、華令人索之、不得、久之、華偶至閭門、見書肆中一人、持文繡閱、極類安、私詢之、人云、此唐解元也、明日修刺往謁、審視無異、及茶至、而妓指露、益信、然終難啓齒、唐命酒對酌、華不能忍、

稍述華安始末以挑之、唐但唯唯、華又云、貌正肖公、不知何故、唐又唯唯、華不安、欲起別去、唐曰、少從容、當有所請、酒復數行、唐命燭導入後堂、召諸婢、擁新娘出拜、華愕然、唐曰、無傷也、拜畢、因携女近華曰、公向言某似華安、不識、桂華亦似此女、否、乃相與大笑而別、見涇林續紀

○○祝京兆

祝京兆有債僻、每肩輿出、則索逋者、繫繫相隨、蓋債家謂不往索、恐其復借、而京兆亦恬然不爲怪也、嘗托言

款客往友家借銀鑲鑲數事既借主人心疑遣僕隨其  
與察之則已汲汲辦銀而棄胚於外矣僕追止之京兆  
曰借我卽我物也汝欲用亦拏一兩事去不妨又歲盡  
乏用遍走東於所親知托言弔喪借得白員領共五十  
餘件并付質庫過歲首諸家奴雲集則皆索白員領者  
也覓典票已失之矣

祝希哲見古法書名畫每捐業蓄之卽故昂其直弗較  
或畱客儲客時卽以所蓄易置得初值僅什一二耳黠  
者俟其窘日持少錢米乞文及手書輒得已小饒更自



貴也。一富家持厚幣求公書墓文。公鄙而不許。既嘗極友人乘間爲言。公曰。必計字價錢乃可。富家治酒延之。公半酣。趣筆墨研來。因令前置一器。每書一字。則投十錢於器內。既書可二三百字。睨視器中曰。足矣。欣然持器竟出。衆留之不得。富家因別倩人筆焉。

○白羊肉羹

羅友字他仁。襄陽人。作荊州從事。桓宣武爲王車騎治集別。友進坐良久。辭出。宣武曰。卿向欲咨事。何以便去。答曰。友聞白羊肉羹。一生未曾得喫。故目求前耳。無事。

可咨、今已飽、不復駐了、無忤色、

○裴御史

崔瞻在御史臺、恒于宅中送食、備盡珍羞、別室獨餐、處之自若、有一御史姓裴、伺瞻食、便往造焉、瞻不與交言、又不命匕筯、裴坐視瞻食罷而退、明日裴自携匕筯、恣情飲啖、瞻曰、君不拘小節、定名士、於是每與同食、

○漢書下酒

蘇子美豪放好飲、在外舅杜祁公家、每夕讀書、以一斗爲率、公密覘之、蘇讀漢書張良傳、至良與客徂擊秦皇

帝撫掌曰、惜乎、擊之不中、遂滿引一大白、又讀至良曰、始臣起自下邳、與上會於酈、此天以授陛下、又撫案曰、君臣相遇、其難如此、復舉一大白、公笑曰、有如此下物、一斗不足多也。

○劉伶

劉伶恒縱酒放達、或脫衣裸形在屋中、人見議之、伶曰、我以天地爲幃宇、屋室爲幃衣、諸君何爲入我幃中

○二張

張敫嘗慕劉伶達生、置一銅銘曰、死便埋我、出或令人

負之。藏獲以爲恥。曰。汝非伯倫僕也。笑而置之壁間。張孝資一見大喜。持以相隨。曰。此非俗人所知。客有乞一荷者。拒之曰。毋污此鋪。遇酒後。遂不肯持。曰。見者以吾黨爲醉。便涉相戲。

昔劉伯倫嘗以鋪自隨。曰。死便埋我。坡仙曰。伯倫非達者也。棺槨衣衾。不害爲達。苟爲不然。死則已矣。何必更埋。不謂千載而下。更有效響。

郭郡倅嗣煥。善張幼子。嘗訂夜談。途遇張孝資。偕之徑造南面大嚙。郭不問。客。張不問主。

○豪飲

石曼卿喜豪飲，與布衣劉潛爲友，嘗通判海州，劉潛訪之，曼卿與潛劇飲，中夜酒欲消，顧甕中有醋，斗餘，乃傾入酒中，并飲之。每與客痛飲，露髮跣足，着械而坐，謂之囚飲。飲於木杪，謂之巢飲。一名取葉束之，引首出飲，謂之鷓飲。其狂縱大率如此。解後爲一菴，嘗過其間，名之曰捫盞菴，未嘗一日不醉。

按石延年與蘇舜欽輩飲，名凡五，其夜不燃燭，謂之鬼飲。飲次挽歌哭泣，謂之了飲。

黃門郎司馬消難常遇高季式與之酣飲重門竝閉取車輪括消難頸又自以一輪括頸消難笑而從之

光孟祖避難渡江欲投胡母彥國初至值彥國與謝鯤諸人散髮裸袒閉室酣飲已累日孟祖將排戶守者不聽孟祖便於戶外脫衣露頂於狗竇中窺之而大叫彥國驚曰他人決不能爾必我孟祖遽呼入與飲

○酒狂

俞華麓宦京師有鄉人邀飲醉後大譁某大僚居密飲所患疾使人請勿譁俞曰爾患疾吾亦患酒狂各無害

也。諱如故。後俞遷閭。而其適撫閭。疏劾曰。聊有晉人風度。絕無漢官威儀。俞拍案笑曰。言絕無可謂知己。但云聊有不無遺憾。

○鄭鮮之

宋鄭鮮之爲人通率。爲武帝所狎。上曾內殿宴飲。朝貴畢至。惟不召鮮之。坐定。謂羣臣曰。鄭鮮之必當自來。俄而外啓尚書鄭鮮之詣神獸門求啓事。帝大笑。引入。

按宋書武帝少事戎旅。不經涉學。後頗慕風流。時或談論。人皆依違。鮮之難必切至。須帝理屈。然後置之。

時人謂爲格倭蓋大有骨氣人不特通率而已。

○飲不擇偶

何承裕爲蓋屋咸陽二縣令醉則露首跨牛趨府往往召豪吏接坐引滿吏因其醉挾私白事承裕曰此見罔也當受杖杖訖復召與飲

謝長史幾卿性通脫會意便行嘗預樂遊苑宴不得醉而還因詣道邊酒壚停車褰幔與車前三騶對飲觀者如堵謝處之自若

袁尹疎放好酒嘗步歷白楊郊野間道遇一士人便呼



與酣飲。明日此人謂被知遇。詣門求通。袁曰。昨飲酒無  
偶。聊相共耳。勿復爲煩。

○劉公榮

劉公榮與人飲酒。雜穢非類。人或譏之。答曰。勝公榮者。  
不可不與飲。不如公榮者。亦不可不與飲。是公榮輩者。  
又不可不與飲。故終日共飲而醉。

王戎弱冠詣阮籍。時劉昶在坐。阮謂王曰。僕有二斗  
美酒。當與君共飲。彼公榮者。無預焉。二人交觴酬酢。  
昶遂不得一杯。而言語談戲。三人無異。或有問之者。

阮答曰、勝公榮者、不得不與酒、不如公榮者、不可不與酒、惟公榮可不與酒、此卽以公榮語戲公榮也

○皇甫亮

皇甫亮三日不上省、文宣親詰其故、亮曰、一日雨、一日醉、一日病酒

○李仲元

李仲元居成都圭里、一鄉皆化其德、以薦起家縣令、鄉人共餞之、因共酣飲月餘、太守使人促行、仲元云、本不之官

○○陶成

陶成字懋學號雲湖寶應人也性至巧嘗見銀工製器  
教之卽出其右小時從師見師母圖其像次見其女又  
圖之皆逼真師怒逐去及師母死傳神者皆弗逮卒用  
其所圖像焉中式上公車二月五日矣語其壻朱升之  
曰聞張家灣某氏丁香盛開子其同吾遊乎升之曰去  
試僅三日公更何往成不許明旦升之他避笑曰彼欲  
進士急耶買輿遲下醉其家五日及揭曉升之登第其  
鄉人醵錢爲賀曰公壻捷矣幸爲我輩作圖以往成曰

善。卽舉筆模丁香一本。尤妙絕。家故饒輕財好俠。嘗一  
至京師。費白金二千。有一面交。卒推分與之。他日以挾  
妓事露。御史欲全之。觀其詩。詭曰。此殆非陶成作也。成  
曰。天下歌詩。豈出陶成之右。而爲他人作乎。御史罵之。  
遂除名。

○○黃勉之

黃勉之風流卓越。當上春官時。適田子莪過吳門。談西  
湖之勝。便輟裝不北上。往遊西湖。盤桓累日。

○○徐昌穀別墅

徐昌穀構別墅實邑之北邙前後塚累累或舉慶曰目中每見此輩定不樂徐笑曰不然見此輩政使人不敢不樂

○陶彭澤

陶靖節在家郡將候陶值其酒熟取頭上葛巾漉酒漉畢還復著之

顏延之爲始安郡過潯陽日造陶潛飲臨去留錢二萬潛悉付酒家稍就取酒貴賤造之者有酒輒設潛若先醉便語客曰我醉欲眠君且去

江州刺史王弘造淵明、無履、弘從人脫履以給之、語左右爲彭澤作履、左右請履度、淵明於衆坐伸脚、及履至、著而不疑、續陽秋

○阮籍

阮籍自言平生曾遊東平、樂其風土、司馬昭大悅、卽拜籍東平相、籍乘驢到郡、壞府舍屏障、使內外相望、法令清簡、旬日而還、昭引爲大將軍從事中郎、有司言子殺母者、籍曰、嘻、殺父乃可、至殺母乎、坐者怪其失言、籍曰、禽獸知母而不知父、殺父禽獸耳、殺母禽獸不若、衆乃

悅服

鄰家少婦有美色，當壚沽酒，籍嘗詣飲，醉便臥其側。兵家女有才色，未嫁而死，籍不識其父兄，徑往哭之，盡哀而返。

籍能爲青白眼，見禮俗士以白眼對之，常言：「禮豈爲我設耶？」時有母喪，稽喜來弔，阮作白眼，喜不懌而去。喜弟康聞之，乃齋酒挾琴造焉。阮大悅，遂見青眼。

○投梭

謝眼鄰家有女，嘗往挑之，女方織，以梭投折其兩齒，既

歸、傲然長嘯曰、猶不廢我嘯歌、

○○追婢

阮仲容咸先幸姑家解卑婢、及居母喪、姑當遠徙、初去、當畱婢、既發、定將去、仲容借客驢、著重服、自追之、累騎而返、曰、人種不可失、

婢卽遠集之母、阮孚字遠集

○○挾妓遊行

揚、用脩在瀘州、常醉、胡傅粉面、作雙丫髻、插花、門生昇之、諸伎捧觴遊行城市、了不爲作

康對山嘗與士女同跨一蹇驢、令從人齎琵琶自隨、遊



行道中、傲然不屑。

○揖妓

俞華麓大夫、與一妓善、後有讌俞者、別召一妓侍飲、他日、遇所善妓於生公石、數呼之、不應、曰、知罪矣、妓曰、汝知罪、卽於此長揖數十、使舉山之人、大笑、方赦汝、遂如其言、見者大笑、旁客曰、殊失觀瞻、曰、觀瞻吾不惜、但恐曩日侍飲人知之、必以此法難我耳。

○○滕元發

滕達道微時、爲范文正館客、常私就狎邪飲、范病之一

夕候其出、逕坐達道書室、明燭讀書、以俟其至、達道大醉、竟入長揖、問范氏讀何書、曰、漢書、復問、漢高帝何如人、范逵逡走入。

○牧司成榜

張幼于初入成均、姜大司成寶、裁士如東濕、戒六院毋遊行、張繞至白門、先入舊院、見榜禁輒收之、謁姜曰、請開一面之網、姜笑曰、吾故疑有此。

○○僧壁畫西廂

丘瓊山過一寺、見四壁俱畫西廂、曰、空門安得有此、僧

日老僧從此悟禪丘問何處悟答曰是怎當他臨去秋波那一轉

○湯義仍講學

張洪陽相公見玉茗堂四記謂湯義仍曰君有如此妙才何不講學湯曰此正吾講學公所講是性吾所講是情

○謝尚

王劉共在杭南酣宴於桓子野家謝鎮西尚往尚書墓還葬後三日反哭諸人欲要之初遣一信猶未許然

已停車、重要、便回駕、諸人入門迎之、把臂使下、裁得脫  
幘、着帽酣宴、半坐、乃覺未脫衰。

○王子猷

王子猷之徽居山陰、夜大雪、眠覺、開室、命酌酒、四望皎然、  
因起、傍皇詠、左思招隱詩、忽憶戴安道、時戴在剡、即便、  
夜乘小船就之、經宿方至、造門不前而返、人問其故、王  
曰、吾本乘興而來、興盡而返、何必見戴。

王子猷出都、尚在清下、舊聞桓子野善吹笛、而不相識、  
遇桓於峴上過、王在船中、客有識之者、云是桓子野、王

便令人與相聞云。聞君善吹笛。試爲我一奏。桓時已貴。顯素聞王名。即便下車。踞胡牀爲作三調。弄畢。便上車去。客主不交一言。

○張季鷹

賀司空入洛陽赴命。爲太孫舍人。經吳閭門。在船彈琴。張季鷹本不相識。先在金閭亭聞絃甚清。下船就賀。因共語。便大相契。問賀欲何之。賀曰。入洛赴命。張曰。吾亦有事北京。因路寄載。便與賀同發。初不告家。家追問。乃知。

○殷豫章

殷洪喬作豫章郡臨去都下人因附百許函書既至石頭悉擲水中因祝曰沈者自沈浮者自浮殷洪喬不能作致書郵

○王敬弘

王敬弘嘗往何氏看女敬弘女適何尚之弟述之值尚之不在寄齋中臥俄頃尚之還敬弘使二婢守關不聽尚之前直語云正熱不堪相見君可且去尚之遂移於他室

○馮道

馮道與趙鳳同在館中書。鳳有女適道仲子。以飲食不中爲道夫人譴罵。趙令婢長號。知院者來訴。凡數百言。道都不答。及去。但云傳與親家翁。今日好雪。

○風流學士

解學士繙訪駙馬。駙馬不在家。公主聞其名。欲窺之。隔簾使人畱茶。解索筆題詩曰。錦衣公子未還家。紅粉佳人叫賜茶。內院深沈人不見。隔簾閒却一團花。公主大怒。遂奏聞。太宗曰。此風流學士。見他做甚。

○李封公陰德

李封公豪邁有逸致嘗赴人飲或問石麓公以大魁拜相公又遐齡享福平生必有大陰德公應曰大未也小則有之其人再三叩問公曰我無他德但值人家招飲不往必預辭往則早赴不煩人奔走只此自信耳

○合歡杖

傭書人蔡臣爲子毆詈屢訴張居士牧因請鞭之曰儻斃誰任蔡曰父在因誘子入密令鎗戶命僮輩兩杖齊下效五代劉銖合歡杖囑以父請乃止鞭至百匄匍而出自是少悛張笑謂鄉人曰是亦爲政



○爭貓

唐裴諝爲河南尹有二人投狀爭貓狀云若是兒貓  
兒卽是兒貓兒若不是兒貓兒卽不是兒貓兒諝大笑  
判云貓兒不識主傍家搦老鼠兩家不須爭將來與裴  
諝遂納其貓